

मार्निंग डोगरी न्यूज़ बुलेटिन,

समै. 09.20 Hrs

<><><><><><>

एह आकाशवाणी जम्मू ऐ, बडलै खबरें च तुंदा सुआगत, पैहले खास-खास खबरें कन्नै जगमोहन शर्मा।

Headlines

1. लेफ्टिनेंट गवर्नर मनोज होरें अज्ज बड्डलै मुंह न्हरे जम्मू दे भगवती नगर आधार शिविर थमां श्री अमरनाथ श्रद्धालुएं दे पैहले जत्थे गी झंडी दस्सियै कश्मीर घाटी लेई रवाना करोआया।
2. 38एं दिनें दी श्री अमरनाथ जी दी जातरा, कल 3 जुलाई थमां विधिवत तरीके कन्नै पहलगाम ते बालटाल थमां शुरु होग। 3 लकख 31 जहार शा मते श्रद्धालुएं इस ब'रे दी जातरा लेई पंजीकरण करोआई लैते दा ऐ।
3. लेफ्टिनेंट गवर्नर मनोज सिन्हा होरें कल संझां तवी आरती च हिस्सा लैता ते जम्मू-कश्मीर दे सांस्कृतिक ते आध्यात्मिक विकास लेई अपनी वचनबद्धता गी फही पक्का कीता।
4. सेहत मंत्री सकीना इतू होरें आखेआ ऐ जे डाक्टर ते सेहत दिक्खभाल खेतर दे पेशेवर, साढ़े देसै दी सेहत प्रणाली दी बुनियाद न।
5. जल शक्ति मंत्री जावेद राणा होरें बन्ने आहले जिले पुंछ च प्रधानमंत्री ग्राम सड़क योजना तैहत जारी परियोजनाएं दी स्थिति दा जायजा लैता ते कम्मैं गी तय समैं दे अंदर-अंदर मय्यारी ांगै'नै सबूरा करने पर जोर दिता।

<><><><><><>

लेफ्टिनेंट गवर्नर मनोज होरें अज्ज बड्डलै मुंह न्हरे जम्मू दे भगवती नगर आधार शिविर थमां श्री अमरनाथ श्रद्धालुएं दे पैहले जत्थे गी झंडी दस्सियै कश्मीर घाटी लेई रवाना करोआया। सख्त सुरक्षा बंदोबस्तें हेठ बम बम भोले ते हर हर महादेव दे नारे लांदे होई 310 लौहकी-बड्डी गड्डिएं दे काफिले च रवाना होए दे इस जत्थे च कुल 5 जहार 892 श्रद्धालु न जिंदे चा 3 जहार 403 श्रद्धालु पहलगाम लेई जिसलै के 2 जहार 489 श्रद्धालु बालटाल लेई रवाना होए न। इस जत्थे च 4 जहार 395 मर्द, 1 जहार 43 महिलां, 31 बच्चे, 335 साधु,

72 साध्वियां ते 16 ट्रांसजेंडर श्रद्धालु शामिल न। इस जत्थे गी घाटी लेई रवाना करोआने मगरा मीडिया कन्नै गल्लबात करदे होई एलजी मनोज सिन्हा होरें आखेआ

38एं दिनें तोहड़ी चलने आहली श्री अमरनाथ जी दी जातरा, कल 3 जुलाई थमां विधिवत तरीके कन्नै पहलगाम ते बालटाल थमां शुरू होग ते 9 अगस्त गी रक्खड़पुन्नेआ आहले दिन संपन्न होई जाहग। इस बारे श्री अमरनाथ जी दी जातरा लेई 3 लक्ख 31 जहार शा मते श्रद्धालुएं पंजीकरण करोआए दा ऐ। उ'आं जम्मू च श्रद्धालुएं दा मौके पर गै पंजीकरण बी शुरू करी दिता गेदा ऐ ते पिच्छले द'उं दिनें दरान 4 जहार शा मते टोकन बंडी दिते गेदे न। श्री अमरनाथ जी दी जातरा लेई प्रशासन नै सुरक्षा सने होरने सब्भै लोड़चदे बंदोबस्त जकीनी बनाए दे न। अमरनाथ जातरा लेई अज्ज बड़लै जम्मू थमां घाटी लेई रवाना होआ करदे किश श्रद्धालुएं आकाशवाणी समाचार कन्नै गल्ल करदे होई अपना जोश किश इस चाल्ली बयां कीता।

<><><><><><>

Add-Yatra flag Off

एहदे शा पैहले लेफ्टिनेंट गवर्नर मनोज सिन्हा होरें जंदे रोज भगवती नगर जातरी निवास दा दौरा लाड़्यै श्री अमरनाथ श्रद्धालुएं लेई कीते गेदे बंदोबस्तें दा जायजा लैता। एलजी होरें श्रद्धालुएं दे रौहने-बौहने, खाने-पीने, सुरक्षा, पंजीकरण, बिजली-पानी, सेहत, हेल्प डेस्क, साफ-सफाई, ट्रांसपोर्ट ते एमरजेन्सी सेवाएं दी समीक्षा कीती ते श्रद्धालुएं कन्नै गल्लबात करदे होई उ'नें सुरक्षित जातरा लेई अपनियां शुभकामनां बी दितिआं।

<><><><><><>

भगवती नगर जम्मू थमां अज्ज बड़लै मुंह न्हरे रवाना होए दे श्री अमरनाथ श्रद्धालुएं दे पैहले जत्थे दा काली माता मंदर टिकरी, उधमपुर च निग्गा सोआगत कीता गेआ। उधमपुर दिएं डिप्टी कमिशनर सलोनी राय ते होरनें ऐहलकारें सने मुकामी लोकें बी श्रद्धालुएं दा गर्मजोशी कन्नै सोआगत कीता। साढ़े उधमपुर संवाददाता मूजब, सूचना विभाग आसेआ आयोजित इक सांस्कृतिक कार्यक्रम नै इस मौके पर चार चन्न लाई दिते। प्रशासन नै श्रद्धालुएं गी अपील कीती ऐ जे ओह सरकार आसेआ कीते गेदे सब्भनें प्रबंधें दा पूरा-पूरा लाह ठोआन। इस सरबंधे च आकाशवाणी समाचार कन्नै गल्ल करदे होई डिप्टी कमिशनर सलोनी राय होरें आखेआ

<><><><><><>

श्री अमरनाथ जातरा शा पैहले कल संझां लेफ्टिनेंट गवर्नर मनोज सिन्हा होरें जम्मू च तवी आरती च हिस्सा लैता। इस मौके पर उ'नें आखेआ जे समूलचा जम्मू-कश्मीर, भक्ति दे रंग च रंगोए दा ऐ ते मुख्य दे बक्ख-बक्ख हिस्सें थमां इत्थे औने आहले श्रद्धालुएं दे सोआगत लेई तैयार ऐ। 2019 दे बाद जम्मू-कश्मीर च आए दे बदलावें गी बड़ा महत्वपूर्ण करार दि'दे होई एलजी होरें आखेआ जे ओह जम्मू-कश्मीर दी परानी शान गी परतियै बहाल करने दे मिशन कन्ने अगगे बधा करदे न। उ'नें आखेआ

<><><><><><>

Itoo-Doctors

सेहत ते डाक्टरी शिक्षा मैहकमे दिएं मंत्री सकीना इतू होरें आखेआ ऐ जे डाक्टर ते सेहत दिक्खभाल खेतर दे पेशेवर, साढ़े देसैं दी सेहत प्रणाली दी बुनियाद न ते एह समाज गी मता सेहतमंद ते तगड़ा बनाने च बड़ी महत्वै आहली भूमिका निभा करदे न। एह गल्ल उ'नें श्रीनगर दे शेर कश्मीर इंस्टीच्यूट ऑफ मेडिकल साइंसेज़ सौरा च डाक्टरें सरबन्धी राश्ट्री ध्याड़े दे सिलसिले च आयोजित समारोह गी संबोधित करदे होई आखी। किट्ठे अगगे भाषण दि'दे होई मंत्री होरें आखेआ जे सेहत दिक्खभाल गी बढ़ावा देने च डाक्टरें दी भूमिका बड़ी महत्वै आहली ऐ ते उ'दी म्हारत जीवन दे बड़े महत्वपूर्ण समें दरान साढ़ा सब्भनें दा मार्गदर्शन करदी ऐ। डाक्टरें गी असल जोद्धा करार दि'दे होई सकीना होरें आखेआ जे ओह पूरी दया भावना, दलेरी ते इक्कजुटता कन्ने समाज दी लगातार सेवा च जुटे दे रौहदे न।

<><><><><><>

Rana-PSGSY Poonch

जल शक्ति मैहकमे दे मंत्री जावेद अहमद राणा होरें कल श्रीनगर आहले सिविल सैक्रेटेरिएट च इक बैठक लाइयै बन्ने आहले जिले पुंछ च प्रधानमंत्री ग्राम सड़क योजना तैहत जारी परियोजनाएं दी स्थिति दा जायजा लैता। बैठक दरान मंत्री होरें सरबन्धत अधिकारिएं गी निर्देश दिते जे ओह कम्में दी रफ्तार च तेजी आहनन ते तय समें-सीमा दे अंदर-अंदर लक्ष्यें गी हासल करना जकीनी बनान। उ'नें आखेआ जे इ'नें परियोजनाएं दे सबूरा होने कन्ने, आम लोकें गी बेहतर सिड़क राबते ते आर्थिक मौके बी हासल होडन। मंत्री होरें परियोजनाएं गी तोढ़ चाढ़दे बेल्ले कम्में दे मय्यार गी बरकरार रक्खने दी जरूरतें पर चेचा जोर दिता।

<><><><><><>

CS-ITI

मुख्य सचिव अटल डुल्लु होरें जम्मू-कश्मीर च आईटीआई दा दर्जा बधाने मतल्लक 60 जहार करोड़ रुपें दी राश्ट्री योजना दी अमल-आवरी पर चर्चा लेई कल इक उच्ची सतह दी बैठक दी प्रधानता कीती। निजी ते सार्वजनिक सांझ-भ्याली दी जरूरतें पर जोर पांदे होई मुख्य सचिव होरें औद्योगिक खेतर कन्नै जुड़े दे सरबन्धत धड़ें गी गुजारिश कीती जे ओह बड़डे नेटवर्क आहले आई.टी.आई. कल्स्टरें दी बवस्था गी अपनान ते उ'नेंगी बजारें दी असल समें आहली मंग मूजब बनान। मुख्य सचिव होरें जम्मू-कश्मीर दे नौजवानें गी उद्योगें लेई तैयार करने ते केन्द्र सरकार दिएं मते महत्वै आहली पैहलकदमिं तैहत रोजगार हासल करने जोग कौशल कन्नै लैस करने गितै बक्ख-बक्ख खेतरें च सैहमती पतरें पर दस्तखत कीते जाने दी जरूरतें पर बी जोर पाया।

<><><><><><>

Traffic

ते हून खबर ट्रैफिक बारै। श्री अमरनाथ जी दी जातरा दे मद्देनजर, अमरनाथ श्रद्धालुएं दे जत्थे गी अज्ज जम्मू थमां कश्मीर घाटी लेई रवाना कीता गेआ। एहदे अलावा हौली मोटर गड़िं, जातरी गड़िं ते निजी कारें गी जम्मू-श्रीनगर राश्ट्री जरनैली सिड़कें पर दौने बक्खी दा आओजाई दी खुल्ल दिती गेदी ऐ। ट्रैफिक विभाग आसेआ जारी कीती गेदी इतलाह मूजब, हौली मोटर गड़िं गी अज्ज बड़डलै 6 बजे थमां दपैही 12 बजे तगर नगरोटा पार करना होग जदके बड़डलै 7 बजे शा दपैही 1 बजे तगर जखैनी ते दिनै साङ्गे 11 बजे शा दपैही 2 बजे तगर काजीगुंड पार करना होग। बड़्डी गड़िं गी इक दिन छोड़ियै इक दिन चलने दी इजाजत दिती गेदी ऐ।

<><><><><><>